

海印三昧十義（宗鏡）

（一）無心能現：謂如來三昧法性平等，離諸名相，不加功用，而能顯現一切諸相。

（二）現無所現：謂如來三昧隨眾生心，現種種相如光如影，了不可得。

（三）能現所現非一：謂如來三昧能現之智，與所現之境一念圓融，十方普應不同。

（四）能現所現非異：謂如來三昧能現之智與所現之境，雖十方普應不同，莫不本乎一念。

（五）無去無來：謂如來三昧萬法現於自心，彼亦不來，自相徧於法界，我亦不去。

（六）廣大：謂如來三昧普徧包容，無法不備，眾生世界，不離一心。

（七）普現：謂如來三昧一切世界於一心中，不簡巨細，皆悉能現。

（八）頓現：謂如來三昧一切世界當念即現，無前無後，色相宛然。

（九）常現：謂如來三昧於諸法相，無有不現之時，非如鏡像，對時方能顯現。

（十）非現現：謂如來三昧寂然不動，為眾生故，於非應中隨感而應。